




## Otkrivamo detalje akcije **SIPA-e** u predmetu „Kapija“ **Mujić tražio 45.000 KM mita**

Uhapšeni direktor „Agrokomerca“ predat Tužilaštvu KS, gdje se branio šutnjom

Ermin Mujić, direktor „Agrokomerca“, kojeg su pripadnici **Državne agencije za istrage i zaštitu (SIPA)** uhapsili u akciji „Kapija“ zbog sumnje da je primio 25.000 maraka mita, predat je jučer u nadležnost Tužilaštvu KS. Ovu informaciju potvrdila nam je i Azra Bavčić, portparolove pravosudne institucije.

Nakon što ga ispita, postupajući tužilac odlučit će koje će mjere biti predložene za osumnjičenoga: pritvor ili



**Mujić prilikom privođenja u Tužilaštvo KS** (Foto: S. Saletović)

mjere zabrane. Saznajemo da se tokom ispitivanja branio šutnjom.

Iz izvora bliskih istrazi nezvanično saznajemo da je Mujić reketirao privrednika N. A. (identitet poznat redakciji), koji u „Agrokomercu“ ima halu i izvozi robu u Austriju. On ga je na kraju i prijavio Tužilaštvu KS. Kod Mujića je prilikom hapšenja pronađena prva rata označenog novca, 25.000 KM, koliko je primio na ruke.

Prema dogovoru, traženi

novac da odobri N. A. još jednu halu za zakupe u „Agrokomercu“ trebao je primiti u Sarajevu, ali se na kraju sve odigralo u Cazinu, gdje ga je **SIPA** i uhapsila po nalogu Tužilaštva KS.

Istraga je pokazala da je Mujić od ovog privrednika tražio 45.000 maraka mita. Uzeo je najprije 25.000 KM, a drugu ratu, 20.000 maraka, trebao je dobiti nedugo zatim. No, nakon što ga je N. A. prijavio, novac je označen. **M.AŠČIĆ**